

## Dörflicheichter 2009

D' Euro isch verby, für vieli fasch chly z' gly,  
De Schwyzer isch's nid gloffe, sy im Basler Sumpf versoffe,  
D' Mafiosi hei chuun gschuttet u d' Russetröim sy zämegchuttet,  
D' Schwobe hei viu gwunne, doch gäge Spanie isch nümme glunge,  
Doch was üs blybe isch, mir danke gäng no dra,  
Isch das super Oranje-Fesch, viva Hollandia !  
\* \* \* \* \*

Hansjoggeli tuet ganz durschtig im ne Beizli hocke,  
Aus Marggezeiche treit är rot-wyss gschtreifti Socke,  
Är tuet es Red Bull bsteue, wo eine hett verbiete wöue,  
U seit: i cha's nid begryffe, so eine isch doch e Pfyffe,  
Derby chame mit däm Gsöff, u das ohni müesse z' lüge,  
Gemäss der Wärbig ou mit blutte Fäuge diräkt heiflüge !  
\* \* \* \* \*

Afangs Johr sy mir em Sämu Schmid e Schnitzubank go vortrage,  
Mir hei die Glägeheit benützt um ihn de fougendes z' frage:  
Dys Amt hesch dim Nachfolger übergäh, em "Ueli dr Chnächt"  
Was hesch so Gfüehl, was meinsch? - Tschegget dä das ächt ?  
Zu däm Kompromiss-Kandidat möchte mir erwähne,  
Aus hundertöufte Bundesrat cha me nume so ne Chaschperli wähle !  
\* \* \* \* \*

Hansjoggeli geit bir UBS id Ygangshau go hocke,  
Als Marggezeiche treit är rot-wyss gschtreifti Socke,  
Ufem Schoss het är sis Lap-Top u das tuet är de starte,  
U de tuet Hansjoggeli eifach no chlei warte,  
Är chnüblet us sim Hosesack, nid öppe e Pischtole,  
Nume e grosse Ghüdersack, wüu är sy Bonus wott abhole !  
\* \* \* \* \*

En visitant le Zoo de Bäle, par nous, des têtes carrées,  
Le sponsoring par un parti suisse nous a quelque peu choqué,  
Tous les 100 m près des clôtures ils ont vraiment marqué  
Sur des affiches: "Ne rien donner aux animaux S.V.P" !  
\* \* \* \* \*

Hansjoggeli tuet im Militär planlos umehocke,  
Aus Marggezeiche treit är rot-wyss gschtreifti Socke,  
Soldatinne wo umehange, halbblutt a ne re Stange !  
U dr Nef wo si Ex brüskiert - u im Sexzeiger inseriert,  
Worum me so eine cha wähle, die Frog isch nid vermässe,  
Der Sämu seit: i weiss es nid, das hani grad vergässe !  
\* \* \* \* \*

Worum hett der Bärner Bär e so ne churze Schwanz ?  
Isch er früecher länger gsi, - me weiss es nid so ganz,  
Für das use z' finge, muess me nid studiere,  
Und ou nid ar Uni glanzvou promoviere,  
Mir hei d' Lösig scho parat, drum tüet jetz guet zueloose,  
E so cha ihm der Zürcher Löi viu besser i ds Füdle bloose !  
\* \* \* \* \*

Hansjoggeli geit bir UBS id Ygangshau go hocke,  
Als Marggezeiche treit är rot-wyss gschtreifti Socke,  
Ufem Schoss het är sis Lap-Top u das tuet är de starte,  
U de tuet Hansjoggeli eifach no chlei warte,  
Bis d' Aktie im Chäuer sy, de chouft är e hampfele y,  
U de heizue spaziere u günschtig d' Wäng go tapezieren !  
\* \* \* \* \*

Schad isch kei Mönschfrässer cho u het ne gfrässe husch,  
Trotzdäm sy mir ne jetze los, dr George Dubelyou Busch,  
Jetze isch in Amerika der Barack Obama dra,  
Mir hoffe dä heig immer e chugusicheri Weschte a,  
süsch: chönnt's de nume es chlyses Tröimli sy,  
Tröimli sy jo süsch so schnäu verby,  
s' chönnt jo nume es chlises Tröimli sy,  
Tröimli sy so schnäu verby !